

Ontmoeting 2

Jesus en die Emmausgangers

Kinders leer dat Jesus oral met ons gaan

Teks: Lukas 24:13–15

Hulpmiddels:

- Viltbord met 3 figure: Jesus en die 2 Emmausgangers
- Prent van broodjie
- 'n Kussingsloop of sak met items soos potlood, plastiekglasie, vrug, liniaal, balletjie, rekkie, ens.



Welkom

“Voel”-speletjie: Plaas 'n paar bekende goed in 'n kussingsloop of sak, bv. potlood, plastiekglasie, vrug, liniaal, balletjie, rekkie, ens. Elke kind kry 'n kans om sy hand in te steek, aan 'n item te voel en te raai wat dit is. Daarna haal hy/sy dit uit en kyk of hy/sy reg is.



Wyding

Stilwoord-ritueel: Maak jou oë toe en dink aan 'n keer toe jy baie gelukkig was. Dit is dalk die heel lekkerste ding wat jy gedoen het of wat met jou gebeur het. Dalk was dit toe jy by iemand was wat jou baie lief het. Dink aan God wat jou BAIE lief het. Ek wonder hoe laat dit jou voel. Sê vir God dankie vir sy liefde.



Woord

Gebruik 'n viltbord en prente om die volgende storie te vertel. 'n Video hiervan is beskikbaar by: https://youtu.be/FWWmaJULhIM?list=PLktlXDwXKqcZX-cW3hOZN3tL_NT-4BViA en by www.kixkinders.co.za

Twee mans wat altyd by Jesus se dissipels was, was op pad van Jerusalem af na die dorpie Emmaus toe. Emmaus was omtrent 12 km van Jerusalem af. Hulle het met mekaar gepraat oor alles wat met Jesus gebeur het. Hulle was bitter hartseer dat Hy gekruisig is. Terwyl hulle daarvoor wonder en praat, het Jesus self nader gekom en saam met hulle geloop. Hulle het Hom glad nie herken nie. Hy vra toe vir hulle: “Waaroor loop julle so met mekaar en praat?” Die twee mans het gaan staan. Hulle was baie hartseer. Kleopas, een van die mans, vra vir Jesus: “Woon jy nie in Jerusalem nie? Weet jy nie van al die dinge wat hier gebeur het in die dae wat verby is nie?”

Jesus het vir hulle gevra: “Watter dinge?”

Die twee mans vertel toe vir Jesus die hele verhaal van hulle vriend, Jesus, wat gevang, gekruisig en begrawe is. (Hulle kom nog nie agter Wie saam met hulle stap nie.) “En nou hoor ons daar is van ons vriende wat sê dat hulle Hom gesien het, dat Hy opgestaan het uit die dood”, het hulle baie ontsteld vir Jesus vertel. Jesus het begin om geduldig aan hulle verduidelik wat Moses en al die profete oor Hom geskryf het. Hy het vir hulle vertel dat God belowe het dat sy Seun weer sou opstaan uit die dood.

Hulle het aandagtig na elke woord wat Jesus sê, geluister en voor hulle hul kom kry was die 12km verby en was hulle in Emmaus. Jesus het gemaak of Hy verder wou loop. Die twee mans wou meer hoor en nooi vir Jesus om by hulle te bly. Dit was al amper aand. Jesus het saam met hulle by die huis ingegaan en by hulle gebly. Hulle het gaan aansit om te eet en Jesus het die brood geneem (soos Hy altyd gedoen het toe Hy voor sy kruisiging saam met sy

dissipels was) en God gedank daarvoor. Hy het die brood gebreek en vir die twee mans gegee. Toe het God hulle laat sien dat dit Jesus was. Maar Jesus het skielik verdwyn en hulle kon Hom nie meer sien nie.

Die mans het nou besef waarom Jesus so opgewonde was om vir hulle alles te vertel en uit die Bybel te verduidelik. Hulle het dadelik opgestaan en in die donker na Jerusalem teruggegaan. Daar het hulle die elf dissipels en ook ander mense by hulle gekry. Hulle was opgewonde besig om te vertel dat hulle vir Jesus gesien het, toe Jesus skielik tussen hulle staan en vir hulle sê: “Vrede vir julle!” Almal het groot geskrik en gedink dis h spook, maar toe hulle aan Hom vat, het hulle gevoel dat dit regtig Hy was.

Kinders kry tyd om oor die verhaal te dink:

1. Ek wonder van watter deel van die storie het jy die meeste gehou.
2. Ek wonder wat jou al groot laat skrik het.
3. Ek wonder hoe dit sou gevoel het om aan Jesus te raak.



Werskaf

- Teken h kronkelpaadjie op die sement of met tou op die vloer. Elke kind kan rustig daardeur stap soos wat die Emmausgangers saam met Jesus gestap het. Sing of speel die liedjie “ I have decided to follow Jesus” terwyl kinders dit doen.
- Kleur die prentjie van die voet in.

Sluit af met die seënbede

Hou almal hande vas in h kring.

Die kinders herhaal agter die aanbieder aan:

Dankie, Heer, vir die Bybel **voor** ons; dankie, Heer, vir die maatjies **langs** ons; dankie, Heer, vir die liefde **tussen** ons.
Amen.

Kinders kry geleentheid om geseën te word deur mekaar en/of die leier. Dit is altyd lekker om dit interaktief te maak!



